

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- राष्ट्र अज्ज राष्ट्रपिता महात्मा गांधी होरें गी उन्दी 154मीं जयंती ते साबका प्रधानमंत्री लाल बहादुर शास्त्री होरें गी उन्दे जन्म ध्याड़े पर श्रद्धांजलि देयै करदा ऐ।
- प्रधानमंत्री नरेंद्र मोदी होर अज्ज मध्य प्रदेश ते राजस्थान च 26 जहार करोड़ रपे दे विकास कम्में दा नीह पत्थर रक्खडन ते उद्घाटन करडन।
- उपराज्यपाल मनोज सिन्हा होरें भविक्ख ताई त्यार प्रशासन विषे पर इक उच्ची सतह दी बैठक दी प्रधानता कीती ते कृषि ते शिक्षा गी प्राथमिकता आले सेक्टर गलाया।
- केंद्री मंत्री साबका जनरल वी.के सिंह होरें आखेआ ऐ जे ओ दिन मता दूर नेई जदुं मकबूजा कश्मीर परतियै भारत कन्नै मिली जाग।

<><><><><><>

Mahatma Gandhi

राष्ट्र अज्ज राष्ट्रपिता महात्मा गांधी होरें गी उन्दी 154मीं जयंती पर श्रद्धांजलि देयै करदा ऐ। मुख्य भरै च ते विदेशें च भारती दूतावासें च इस मौके पर नेकां समारोह लाए जा रदे न। राजधानी दिल्ली च बापू हुंदी समाधि राजघाट पर सर्व धर्म प्रार्थना सभा दा आयोजन कीता गेआ। प्रधानमंत्री होरें अज्ज बड्डलै राजघाट जाइयै महात्मा गांधी होरें गी पुष्पांजलि भेंट कीती। लोकसभा दे स्पीकर ओम बिरला, केंद्री मंत्री हरदीप सिंह पुरी, डाक्टर जितेंद्र सिंह ते मीनाक्षी लेखी ते कांग्रेस अध्यक्ष मल्लिकार्जुन खड़गे होरें बी महात्मा गांधी होरें गी राजघाट जइयै

श्रद्धांजली भेंट कीती ऐ। राष्ट्रपिता गी अपनी श्रद्धांजलि दिंदे होई राष्ट्रपति द्रौपदी मुर्मू होरें आखेआ ऐ जे गांधी हुंदे सच्चाई ते अहिंसा दे असूलें विश्व आस्तै इक नमीं बत तयार कीती। अपने संदेश च उप-राष्ट्रपति जगदीप धनखड़ होरें आखेआ जे भारत दी आजादी दी लड़ाई च गांधी हुंदे सच्चाई ते अहिंसा दे सिद्धांत मार्ग-दर्शक बने। प्रधानमंत्री होरें श्रद्धांजलि आले स्नेह च आखेआ जे महात्मा गांधी हुंदी शिक्षा स्हाड़े रस्ते पर बरोबर लो करै करदी ऐ। उनें आखेआ जे महात्मा गांधी हुंदा प्रभाव विश्व व्यापी ऐ जेड़ा मनुक्खता ते भाईचारे दे जज्बे गी अगड़े बदाने आस्तै समुची मानवता गी प्रेरित करदा ऐ। राष्ट्र अज्ज साबका प्रधानमंत्री लाल बहादुर शास्त्री होरें गी बी उन्दे जन्मदिन पर चेता करै करदा ऐ। प्रधानमंत्री नरेंद्र मोदी होरें आखेआ ऐ जे लाल बहादुर शास्त्री हुंदी सादगी, राष्ट्र प्रति उन्दा समर्पन ते जय जवान जय किसान दा नारा अज्ज बी असेंगी प्रेरित करदे न। उपराज्यपाल मनोज सिन्हा होरें बी महात्मा गांधी ते लाल बहादुर शास्त्री होरें गी उन्दी जयंती पर अपनी श्रद्धांजलि भेंट कीती ऐ।

<><><><><><>

Special-Campaign-Swachhta

साफ-सफाई दी महत्ता पर जोर पांदे होई ते सरकारी दफ्तरें च समय सिर कम्म पूरा होने गी ध्यान च रखदे होई इक खास मुहिम शुरू कीती गई ऐ। इस मुहिम दा त्रिया चरण राष्ट्रपिता महात्मा गांधी हुंदी जयंती दे मौके शुरू कीता जा करदा ऐ। अज्जै कोला शुरू एह खास मुहिम 31 अक्तूबर तोड़ी चला'रदे कार्यक्रमें दे तैहत एह खास स्वच्छता अभियान चलाया करदा ऐ। कार्मिक, लोक शकैत ते पेंशन मंत्रालय दे मुताबक तकरीबन 90 लक्ख मुरब्बा फुट इलाके गी पिछले द'ऊं बरें दौरान स्वच्छता अभियान चलाइयै साफ करवाया गेआ ऐ ते इस थाह गी

खेतीबाड़ी आस्तै इस्तेमाल च लेआंदा जा'रदा ऐ। एहदे अलावा सरकार नै कबाड़ गी ठिकाने लाड़्यै 370 करोड़ रपे राजस्व हासल कीता ते 56 जहार लोक शिकायतें दी बी सुनवाई होई।

<><><><><><>

PM
प्रधानमंत्री नरेंद्र मोदी होर अज्ज राजस्थान ते मध्य प्रदेश दे दौरै पर जाडन ते 26 जहार करोड़ रपे दिएं बक्ख-बक्ख विकास योजनाएं दा नीह पत्थर रक्खडन ते किश सेवां देश गी समर्पित करडन। प्रधानमंत्री होर चितोड़गढ़ जाडन ते 7 जहार करोड़ दी लागत दे विकास कम्में दा नीह पत्थर बी रक्खडन। स्हाड़े संवाददाता नै दस्सेआ ऐ जे प्रधानमंत्री होर चितोड़गढ़ च इक जनसभा गी संबोधित बी करडन। एहदे मगरा प्रधानमंत्री होर ग्वालियर, मध्य प्रदेश बी जाडन जित्थे ओह 19 जहार 260 करोड़ रपे दे केई विकास कम्में दा नीह पत्थर रक्खडन। प्रधानमंत्री होर 11 जहार 895 करोड़ रपे दी कीमत कन्नै तैयार होए दे दिल्ली बड़ोदरा एक्सप्रेस-वे दी शुरूआत करडन ते 1 जहार 880 करोड़ रपे दी लागत आली 5 शिड़क परियोजनाएं दा नीह पत्थर रक्खडन।

<><><><><><>

LG
उप-राज्यपाल मनोज सिन्हा होरें शिक्षा ते कृषि गी प्राथमिकता आले दो सेक्टर गलांदे होई आखेआ ऐ जे 2047 तोड़ी विकसित भारत दे लक्ष्य गी पूरा करने आस्तै अगले त्रैं बरें ताई लक्ष्य निर्धारित करना लाजमी ऐ एह गल्ल उनें कल राजभवन च भविक्ख ताई तयार सुशासन विषे बारै लाई गेदी इक उच्ची सतह दी बैठक दी प्रधानता करदे होई आक्खी। उप-राज्यपाल होरें

आखेआ जे संगठित रूख अपनाने कन्नै लोकें पर आधारित नीतिएं दी बवस्था तयार करने ते जलवायु परिवर्तन, साईबर चुनौतिएं ते सेहत, शिक्षा ते कृषि कन्नै जुड़े दे मामलें दा समाधान करने च मदाद होग। उनें योजनाएं ते स्कीमें दी खरी अमलावरी आस्तै मसनुई ज्ञान ते नमीं टेकनालजी दे समावेश पर जोर पाया। उप-राज्यपाल होरें योजना, विकास ते निगरानी आले महकमे गी सरकारी स्कीमें दे लाह जनता तोड़ी पुजाने ते जोखिम ते नुकसान गी घट्ट करने ताई अपने आप गी तयार करने लेई आखेआ। बैठक च मुख सचिव डाक्टर अरुण कुमार मेहता, जम्मू कश्मीर दी युनिवर्सिटीएं दे वायस चांसलरें ते बक्ख-बक्ख मैहकमें दे अधिकारिं बी हिस्सा लैता।

<><><><><><>

POJK-V.K. Singh

केंद्री मंत्री ते पूर्व सेना प्रमुख जनरल वी.के सिंह होरें आखेआ ऐ जे ओ दिन दूर नेई ऐ जिस दिन पाकिस्तान दे कब्जे आला कश्मीर बी भारत कन्नै रली जाग। एह गल्ल केंद्री मंत्री होरें कल दिल्ली च आयोजित तिरंगा रैली गी संबोधित करदे होई आक्खी। इस रैली दा आयोजन मुस्लिम नेशनल फोरम तरफा कीता गेआ हा। उनें आखेआ जे स्हाड़े आस्तै एह समझना जरूरी ऐ जे पाकिस्तान दे कब्जे आला जम्मू-कश्मीर स्हाड़ा ऐ, स्हाड़ा गै रौग ते कोई बी औदे पर कब्जा नेई करी सकोग। उनें आखेआ जे जल्दी गै पीओके च रौने आले लोकें च जागरूकता पैदा होग ते ओ भारत कन्नै रली जांडन।

Suspension

भ्रष्ट अधिकारिणं बकखी सख्त रवैया अपनांदे होई जम्मू-कश्मीर प्रशासन नै पुलिस दे दो बड्डे अधिकारिणं गी मुआतल करी दिता ऐ। भ्रष्टाचार मामले च गिरफ्तार डीएसपी शेख आदिल बी एदे च शामिल न। जम्मू-कश्मीर गृह विभाग दे आदेश मुताबक आदिल मुश्ताक गी 21 सितंबर 2023 थमां मुआतल समझा जाग। इक बकखरे आदेश च एस.एस.पी बडगाम गोहर अहमद खान गी बी मुआतल करी दिता गेआ ऐ।

<><><><><><>

NCC

जम्मू-कश्मीर ते लद्दाख थमां एन.सी.सी कैडेट्स नै नमीं दिल्ली च आयोजित राष्ट्री थल सेना कैंप दौरान कराई गेदी प्रतियोगिताएं च बेहतरीन प्रदर्शन कीता ऐ। ब्रिगेडियर वी.के शर्मा, एन.सी.सी दे उपमहानिदेशक होरें दस्सेआ जे जागतें दी प्रतियोगिता च स्हाडे एन.सी.सी कैडेट्स नै चौथी थार हासल कीती ऐ ते कुड़िणं दे मुकाबले च 14मां थार हासिल कीता ऐ। उनें दस्सेआ जे थल सेना कैंप दे 12 दिनें दौरान एन.सी.सी कैडेट्स नै टैंट लाने,, वाद-विवाद, स्वास्थ्य, साफ-सफाई, बैटल खेड्ड जनेइणं प्रतियोगिताएं च हिस्सा लैता। उनें मेद कीती ऐ जे एन.सी.सी कैडेट्स समाज दे दुए सदस्ये गी बी जीवन च अनुशासन ते राष्ट्रवाद लेआने आस्तै प्रेरित करडन। ब्रिगेडियर वी.के शर्मा होरें आखेआ।

<><><><><><>

Asian-Cup

हंगजाऊ, चीन च चला'रदिएं एशियाई खेड्डें दे 8में दिन भारत दे खडारिएं अपनी चमक बरकरार रखदे होई कुल 53 तगमे जिती लैते न। इन्दे च 13 सुन्ने दे, 21 चांदी दे ते 19 कें दे तगमे शामिल न। एशियाई खेड्डें दे 8में दिन भारत नै 3 सुन्ने दे, 7 चांदी दे ते 5 कें दे तगमे अपने नांस कीते। दौड़ च भारत नै 2 सुन्ने दे तगमे हासल कीते। निशानेबाजी च बेहतरीन नतीजे रेय जेदे च 7 सुन्ने दे तगमे सनें कुल 22 तगमे भारत नै जिते न। प्रधानमंत्री नरेंद्र मोदी ते खेड्ड मंत्री अनुराग सिंह ठाकुर होरें भारतीय खडारिएं गी मुबारकबा दिती ऐ।

Patnitop

पत्नीटाँप विकास प्राद्यिकरण पास्सेआ चलाए जा करदे “पत्नीटाँप दी सैर करो” कार्यक्रम तैहत सैरसफा विभाग जम्मू नै एक्साइज मैहकमे, माता वैशणो देवी युनिवर्सिटी, पत्नीटाप विकास प्राद्यिकरण ते जिला इंतजामिया उधमपुर दे सहयोग कन्नै कल पत्नीटाँप थवां गौरीकुंड तोड़ी इको ट्रायल दा आयोजन कीता। एहदे तैहत प्रसिद्ध शिव स्थान सुद्ध महादेव-मान तलाई तोड़ी तीर्थ यात्रा दे प्राचीन रस्ते गी उजागर कीता गेआ। उत्तर प्रदेश, बिहार, महाराष्ट्र, दिल्ली, राजस्थान, झारखंड, गुजरात, छत्तीगढ़, हरियाणा, जम्मू-कश्मीर ते नेपाल थमां श्री माता वैशणो देवी युनिवर्सिटी दे विद्यार्थिएं ते अमलें नै इस जातरा कार्यक्रम च हिस्सा लैता।

Kishtwar

किश्तवाड़ थवां सुप्रिया देवी नै जम्मू यूनिवर्सिटी च कराई गेदी 21मीं जे.एण्ड.के यू.टी एथलेटिक्स चैंपियनशिप च सुन्ने दे त्रै तगमे हासल कीते न। आकाशवाणी दे संवाददाता नै दस्सेआ ऐ जे सुप्रिया देवी नै हाई जंप, डिसकस थो ते शार्टपुट च सुन्ने दे तगमे हासल कीते न।

<><><><><><>